



ভোট ডাকাতি প্রতিহতে জনগণকেই এগিয়ে আসতে হবে: জামায়াত আমির



সংগৃহীত ছবি

ভোটের দিন জনগণকে সতর্ক থেকে কেন্দ্র পাহারা দিতে আহ্বান জানিয়েছেন জামায়াত-এ ইসলামের আমির ডা. শফিকুর রহমান। তিনি বলেন, কেউ ভোট ডাকাতির চেষ্টা করলে তাকে প্রতিহত করতে হবে। পাশাপাশি তিনি শিক্ষা ও অর্থখাত সংস্কারের অঙ্গীকার করে বলেন, নৈতিকতা ও শৃঙ্খলার মাধ্যমে দেশকে দুর্নীতিমুক্ত করা হবে।

রাজধানীর মিরপুরে শুক্রবার (১০ অক্টোবর) সন্ধ্যায় এক মতবিনিময় সভায় বক্তৃতাকালে জামায়াত-এ ইসলামের আমির ডা. শফিকুর রহমান বলেন, “নির্বাচন সুষ্ঠু করতে হলে জনগণকেই ভূমিকা নিতে হবে। ভোট ডাকাতির চেষ্টা করলে সবাই মিলে তা প্রতিহত করতে হবে।” তিনি জোর দিয়ে বলেন, “ভোটকেন্দ্র আমাদের গণতন্ত্রের দুর্গ—এটিকে রক্ষা করা প্রত্যেক নাগরিকের দায়িত্ব।”

তিনি আরও বলেন, ক্ষমতায় গেলে প্রথম কাজ হবে শিক্ষা ব্যবস্থার সংস্কার। নৈতিক শিক্ষা শক্তিশালী হলে সমাজে লুটপাট, দুর্নীতি ও বৈষম্য কমে যাবে। অর্থনৈতিক খাতে শৃঙ্খলা ফেরাতে উদ্যোগ নেওয়া হবে, পাশাপাশি বিদেশি বিনিয়োগকারীদের জন্য নিরাপদ পরিবেশ নিশ্চিত করা হবে।

ডা. শফিকুর রহমান সভায় বলেন, “দেশে যে নষ্ট রাজনীতির সংস্কৃতি তৈরি হয়েছে, জামায়াত ইসলামী সেটি ভেঙে দিয়ে একটি নৈতিক, ন্যায্যভিত্তিক ও সমৃদ্ধ বাংলাদেশ গঠনে কাজ করবে।” তিনি চাঁদাবাজ ও দুর্নীতিবাজদের বিরুদ্ধে কঠোর ব্যবস্থা নেওয়ার প্রতিশ্রুতিও দেন।